

汝州志卷之五

兵防

祥符縣舉人 趙林成

同纂

知汝州事三韓白明義

古者兵寓於農出則荷戈入則負耒故農富而兵亦強秦設材官漢置車騎更番調發人猶迭相爲兵唐宋以來兵與民始分爲二汝自周鼎重遷戎馬倥傯殆無虛日唐宋之際間爲戰場金元紅賊構難嘯聚成林洎乎明季流寇曠徒紛紜蹂躪日相尋於干戈而閭屬之民岌岌乎靡有子遺矣幸際聖朝掃除奠定居是邦者安其生樂其業迄今垂二百年然康熙

二十九年盜起魯山嘉慶五年賊發寶豐雖小寇跳梁旋歸撲滅而運籌於倉卒決勝於須臾詎非守土者之責歟故曰兵可百年不用不可一日不備也

唐以前兵無專置不具詳新唐書地理志汝州有府四曰龍興魯陽梁川郟城

按府兵之制新唐書兵志貞觀十年復採隋折衝果毅郎將之名改統軍爲折衝都尉別將爲果毅都尉諸府總曰折衝府凡天下十道置府六百三十四皆有名號分置於諸州而名隸諸衛凡三等兵千二百人爲上府千人爲中府八百人

爲下府置折衝都尉一人左右果毅都尉各一人長史兵曹
別將各一人校尉六人也士以三百人爲團團有校尉五十人
爲隊隊有正十人爲火火有長

鄴侯家傳

玉海引

隋鷹揚府皇朝改爲折衝府折衝樽俎之間

旋師衽席之上也改郎將爲都尉又置果毅都尉二人爲之

副及別將一人全府召發則折衝都尉以下偕行不盡則果

毅行少則別將行每發及皆下符契於本州及府刺史與折

衝勘契而發之給其食券至幕所期處驗其藝非精士不教

習則罪其折衝甚則加罪州牧有功而回入塞便道策勲加

賞而罷之

義軍元結表墓碑銘充山南東道節度參謀仍於唐鄧汝蔡等
州招緝義軍山棚高晃等率五千餘人一時歸附大壓賊境
於是思明挫銳

工兵元史百官志至正十四年五月置南陽鄧州等處毛葫蘆
義兵萬戶府募土人爲軍免其差役令討賊自効先是鄉人
自相團結號毛葫蘆故因以名之

大學衍義補今唐鄧山居者以毒藥漬矢射獸應弦

而倒謂之毛葫蘆按毛葫蘆之制見朶爾直班傳朶爾直班
督諸軍復商州乃修築奉元城壘募民爲兵出庫所藏銀爲
大錢射而中的者賞之由是人皆爲精兵金商義兵以獸皮

其之由是其軍遂
盛而國家獲其用

車兵明史兵志天下既定度要害地係一郡者設所連郡者設
衛大率五千六百人爲衛千一百二十人爲所汝之設衛仿

此又明史藝兵志河南都司舊有洛陽中護衛後併汝州衛

又有伊府儀衛司

按職官志洪武五年置護衛指揮使司每

千戶十人百戶十人又攷汝州長營舊碑嘉靖己未伊藩撰
稱掌國事體元子今宜寶鋪乃其管屯官廳事其舊培塿乃
其聽政樓也其文曰洪武二十五年月日太祖高皇帝御左
順門諭指揮葛川伊王於明年出閣河南你可先於五百里
內屯種多種小麥以便家口就食葛川奉命遂於汝州襄城
魯山郟葉等處屯種設百戶二十典儀所六按明史伊王傳
伊厲王模太祖第二十五子洪武二十一年生生四年受封
永樂六年之藩洛陽長營碑文載二十五年云云明年出閣

是時方六歲必不令就藩當
以史永樂六年之藩爲是

鄉兵明史藁鄉兵所在多有河南嵩縣曰毛葫蘆長於走山習

短兵

僧兵推少林次則伏牛伏牛學於少林以禦礦盜者

案汝州西南境與嵩縣毗連南與鄧州相望毛葫蘆兵當時
鄉衆團結亦必有此且據分巡僉事崔應麟保魯去思碑調
指揮武舉武生暨官軍僧毛兵若干數分鎮要害此已用之
效也僧兵次推伏牛伏牛出魯山西境之外古亦魯山壤地
也陟餘叢考崇禎中史記言知陳州以流賊充斥乃募士聘
少林僧訓練之蓋僧兵倡以禦寇明季遍州縣皆習之矣按
僧兵始於初曹寺有
秦王賜寺僧教可証

招募按韓昌黎與鄂州柳中丞書招募土人必得豪勇與賊

熟知其氣力所極無望風之驚愛護鄉里勇於自戰徵兵滿萬不如召募數千蓋古之諳悉軍事者皆選土民以用其長然非素結之以恩信而臨時募僱所謂驅市人而戰之也

汝州衛統轄汝州南陽二郡鄉各置營營各設弁

俱詳職官表

國朝順治十六年裁衛併地入汝州額設千總一員屬河南營

卽鎮標九營之一也所屬協防汛弁二人一防郊縣一防登

封通志雍正三年巡撫田文鏡題准經制把總三員原防宜

陽澠池伊陽新安今改防魯山寶豐伊陽各一員

按雍正三年魯山未

改經制把總以前設千總一員原防汝州魯山郊縣寶豐今改防汝州郊縣登封

汝州營署

在州治青龍街署南箭道一處東南
偶建立武帝廟一座

汝州城汎

額設馬兵三名弓箭手七名鳥鎗手三名書辦二名

東塘車渠汎墩臺一座

距城二十里

長阜汎墩臺一座

距城四十里

西塘廟下汎墩臺一座

距城三十五里

臨汝汎墩臺一座

距城六十里

以上四汎各設官廳三間兵房十五間木牌坊一座烟墩五
個黃旗一面墩臺梯一架什物架一個木棚一個守墩馬兵
一名弓箭手二名
名鳥鎗手二名

共設兵丁三十四名

馬兵每名每日餉銀一錢手兵每名五
錢

演武場

在西關外舊有

武帝廟三楹演武廳三楹

座照壁一道現在房屋破壞每逢歲考四屬輪值

鋪舍

額設十四處共計鋪司兵四十二名餉銀三百零一兩四錢遇閏加銀二十五兩二錢

衙前總鋪

司二名
兵六名

東十里鋪

司一名
兵二名

東二十里鋪

司一名
兵二名

東趙落鋪

司一名
兵二名

西十里鋪

司一名
兵二名

西春店鋪

司一名
兵二名

西廟下鋪

司一名
兵二名

西官莊鋪

司一名
兵二名

西臨汝鋪

司一名
兵二名

西溫泉鋪

司一名
兵一名

南十五里鋪

司一名
兵一名

南小屯鋪

司一名
兵一名

北十里鋪

司一名
兵一名

北二十里鋪

司一名
兵一名

額設民壯三十名餉銀二百四十兩驛馬六匹

凡四縣營汛兵額均詳本志不備載

附明季兵禍

汝州前志所載不詳迄今二百餘年更難採輯姑即前志所載者錄之而以四邑附焉均依年代以

次敘入俾

閱者瞭然

正德六年魯山流寇猖獗到處焚劫以邑舉人劉茂孝感免致焚屠

薊賊劉六劉七反至邾攻城邾民多方禦之大砲將賊白大

王擊死賊遂退攻寶豐破之知縣徐端遁去

寶邑土城不能禦遂入搶掠賊

首領趙風子燧係文安秀才注念斯文凡士大夫家授令箭一枝掛藍衫於門前部卒俱不敢入百姓殺戮亦少兵備會

事孫磐賁黃榜招撫燧

乞奏辨遂去進攻裕州

嘉靖元年賊王堂反過邾境不敢入至禹州遂滅

三十二年歸德師尙詔反聚眾十萬勢甚猖獗將至齊魯
王之誥率兵禦之於境上滅之

萬歷二十一年大饑葉縣青山寨嘯聚千餘人作亂汝州分

巡僉事崔應麟

魯邑志作麒

移駐魯山遣主簿馬大用設伏曹鎮

賊夜至伏發俘戮甚多

按崔公保魯去思碑其云或盤據窠石或結陣青山卽志所指

崇禎五年壬申魯山東鄉土賊張三杜小川等作亂七月初

二日闔邑驚逃惟教諭范志懋衣冠坐東城督守後賊漸平

六年癸酉冬流寇渡河而南十二月十六日抵魯城下弗克

遂分攻汝州郟縣寶豐伊陽自是羽書旁午官民無安枕之

日矣

八年乙亥賊攻魯山五晝夜防守甚密官兵自北至寇遁由
是無歲不掠村鎮而四野凋敝盡矣

十三年庚辰六月魯山守城千總詹思鸞叛挾令招安知縣
楊呈芳陽從陰距十一月夜密令千總李一鳴擒殺之遂平
七月伊陽土賊陷城知縣孔貞璞赴州遇賊而死十一月賊
復來盤踞城垣民無存者十二月郟縣土賊楊同錦聶三登

武岡劉定國等手刃入城橫行劫殺據城請招安

時總鎮于
紹禹駐防

襄城聞變馳檄徵兵葉縣副鎮劉國能率兵至紹禹攻東門

公韓檄汝州吏目顧王家撫賊遂罷兵魏以陞任紆道由
豐去巡撫李仙風檄開封府同知趙察撫賊狀趙受賊賂
萬言賊忠欸可用請給都可守備告身者三十餘人由是賊
益熾殺人如屠犬豕邑人參謀通判李之綸密揭賊狀願擒
賊自効巡撫以詰趙趙洩其語
賊殺之綸全家遂成撫局

十四年辛巳二月李自成破洛陽攻汝州州守錢祚徵禦之
攻四日城陷屠之祚徵及吏目朱任鄉皆不屈死賊遂進取
郊同錦出郭迎且言願守郊以當一面自成怒斬之知縣邵
子灼以不速降遇害自成置僞官而去夏四月新令李貞佐
蒞任高凌雲遂殺僞官並聶二及父聶三登高世泰李文昇
等嗣是同錦黨武岡復熾

十五年壬午春闖賊復至邾因高凌雲殺所置僞官平城副
凌雲執邑令李貞佐不屈並副之殺紳民無算官廨民舍爲
墟四月魯山土賊復叛知縣楊呈芳登城安撫詹思鸞餘黨
弑之城遂陷五月張獻忠陷寶豐知縣朱由械及典史程某
死之賊叔諸生於城東河仄龍王廟會問姓名操土音曰咱
是斯文一氣老子學而未成歟詔良久遣各入城而去
閏十一月流寇陷魯山土賊潛遁屠戮良民無算是月闖賊
復陷寶豐殺擄十之七八焚廬舍殆盡

十六年癸未流寇復陷魯山民有避居西山者無論男女悉
搜殺之流寇至而土賊遁流寇去而土賊來民自是無遺類

矣秋七月闖賊駐襄陽府改寶豐爲寶州置僞官九月經

孫傳庭破之殺僞州牧陳可新州判姜渭遂擣唐縣殺賊家

口殆盡轉戰至郊邑擒僞果毅將軍謝君友並僞將蔣山李

大存孫月等誅之殺僞郊令周英主簿劉溥斫賊坐纛尾自

成幾獲而奔襄城大軍進逼之賊決死拒守時官軍皆露宿

與賊持久雨泥渾糧車不能前士盡飢還攻郊破之獲馬羸

噉之立盡雨七日不止後軍譁遂大敗賊遂入潼關傳庭與

監軍副使喬遷高躍馬大呼而歿於陣屍竟不可得傳庭死

關以內無完城矣

綏寇紀畧云孫督師全軍駐龍門催孟縣之糧別遣兵五千追賊於汝州賊已盡奔

寶豐九月初八日我師進次汝州之長阜鎮僞督尉李養純迎降聞自成在襄陽西築汝寧及屬邑七城待戰諜者曰賊老營在唐縣精銳屯襄陽撤郊縣僞將吏歸保寶豐并兵設守以爲犄角傅庭乃別遣游擊從間道擣唐縣而自以大軍從汝州進初十日師次寶豐賊已改縣爲寶州守兵甚多傅庭曰我師前爭利而寶豐或犄其後則腹背受敵矣諭降不下乃留攻克之申令毋妄殺人上卒不受命遂聚眾而殲焉

土賊起於崇禎五六年間內則歲饑荐臻外則流寇交訐奸黠之徒乘間竊發嘯聚成羣而束手待斃之餓夫計不如相從苟活以是蔓延滋長始圖野掠繼遂犯城凡州境所屬之山川盡爲巢穴矣是時官司法令蕩然旣不能追捕而彼潛藏巖穴卽流賊亦無如何故生民屠戮無遺而彼反帖然無恙

直至

國朝殄除餘孽蕩滌殷頑時河南府總鎮高遣都司范率兵搜緝勦撫兼施而揭竿亡命之徒自此絕跡云

國朝魯山縣兵事附

康熙二十九年五月山賊王化龍等嘯聚作亂白晝劫掠市井中張良店諸村落被害尤甚男女逃竄鄰邑戒嚴州守王登魁星夜赴魯計賺渠魁五六人諭以招安且以銀牌爲質約六月初三日領給之及期賊果偕戎首數十人來典史王公選獨知其爲我所給也比入門立捕擒之幾爲賊所傷州